

史記扁鵲倉公傳補註下卷

漢太史令司馬遷撰

宋中郎外兵曹參軍裴駰集解

唐國子博士宏文館學士司馬貞索隱

唐諸王侍讀率府長史張守節正義

雙流張驥補註

齊丞相舍人奴從朝入宮臣意見之食閨門外望其色有病氣

補註閨門即閨閣宮中小門也史記身眞爲閨閣之臣甯得自引深藏於巖穴耶靈樞根結篇形氣不足

病氣有餘是邪勝也急瀉之形氣有餘病氣不足急補之形氣不足病氣不足此陰陽氣俱不足也不可刺之

臣意卽告宦者平平好爲脈學臣意所臣意卽示之舍人奴病告之曰此傷脾氣也

補註靈樞脈度篇脾氣通於口口和則能知五穀矣淫邪發夢篇脾氣盛則夢歌樂身體重不樂素問藏氣法時論病在脾愈於秋秋不愈甚於春春不死持於夏起於長夏又脾病者愈在庚辛庚辛不愈愈於甲乙甲乙不死持於丙丁起於戊己日昃慧日出甚

下晡靜舍人奴傷脾氣病得之汗出當風王太后風痺客忤病得之汗流出滯病因同而一入膀胱一入脾者膀胱水太陰濕亦從其類也

當至春鬲塞不通不能食飲

補註素問陰陽別論三陽結謂之膈素問生氣通天論病久則傳化上下不并良醫不爲故陽畜積病死而陽氣當隔隔者當寫不亟正治粗乃敗之奴之病正與此同故主死靈樞本藏篇肝大則逼胃迫咽則苦膈中形氣藏府病形篇微急爲膈中食飲入而還出後沃沫四時氣篇飲食不下膈塞不通邪在胃脘

在上腕則刺抑而下之在下腕則散而去之難經三十二難故令心肝在膈上按卽胸中隔塞不通也膈通

法當至夏泄血死宦者平卽往告相曰君之舍人奴有病病重死期有日相君曰卿何以知之曰君朝時入宮君之舍人奴盡食閨門外平與倉公立卽示平曰病如是者死相卽召舍人奴而謂之曰公奴有病不舍人曰奴無病身無痛者至春果病至四月泄血死所以知奴病者脾氣周乘五臟傷部而交故傷脾之色也望之殺然黃察之如死青之茲眾醫不知以爲大蟲

集解徐廣曰殺音蘇葛反

正義殺蘇亥反

索隱蟲卽虵虫也

補註素問脈要精微論青欲如蒼璧之澤不欲如藍黃欲如羅裏雄黃不欲如黃土玉機眞臟論脾受氣於肺傳之於腎氣舍於心至肝而死一日一夜五分於此所以占死生早暮也卽周乘五臟之候詳潘滿人如案以次相乘註

不知傷脾所以至春死病者胃氣黃黃者土氣也土不勝木故至春死所以至夏死者脈法曰病重而脈順清

者曰內關內關之病人不知其所痛心急然無苦若加以一病死中春一愈順及一時其所以四月死者診其人時愈順愈順者人尙肥也奴之病得之流汗數出灸於火而以出見大風也

補註玉機眞藏論病熱脈靜泄而脈大脫血而脈實病在中脈實堅病在外脈不實堅皆難治平人氣象論亦云與此病重而脈順清者死其爲逆則同女子監病傷脾得之流汗曰內關嘔血死此與略同注見前

菑川王病召臣意診脈曰蹶上爲重頭痛身熱

正義上時掌反蹶逆氣上也

補註素問奇病論人有病頭痛此安得之岐伯曰當有所犯大寒內至骨髓髓者以腦爲主腦逆故令頭痛名曰厥逆方盛衰論氣上不下頭痛巔疾靈樞厥病篇厥頭痛面若腫起而心煩取之足陽明太陰厥頭痛頭脈痛心悲善泣視頭動脈反盛者刺盡去血後調足厥陰厥頭痛貞貞頭重而痛寫頭上五行行五先取手少陰後取足少陰厥頭痛意善忘按之不得取頭面左右動脈後取足太陰厥頭痛項先痛腰脊爲應先取天柱後取足太陽厥頭痛頭痛甚耳前

後脈涌有熱寫出其血後取足少陽難經六十難手
三陽之脈受風寒伏留而不去者則名厥頭痛

使人煩滿臣意卽以寒水拊其頭

正義懣亡本反非但有煩也

索隱拊音附又音撫

補註說文煩熱頭痛也懣音悶煩也從心從滿滿亦
聲素問刺熱論諸治熱病以飲之寒水乃刺之必寒
衣之居止寒處身寒而止也倉公以寒水拊頭本此
刺足陽明脈左右各三所病旋已病得之沐髮未乾而
卧診如前所以蹶頭熱至肩

補註素問風論新沐當風謂之首風首風之狀頭面
多汗惡風先風一日則病甚頭痛不可以出內

齊王黃姬兄黃長卿家有酒召客召臣意諸客坐未上
食臣意望見王后弟宋建告曰君有病往四五日君要
脅病不可俛仰

正義俛音免

補註素問脈要精微論腰者腎之府轉搖不能腎將
憊矣六元正紀大論太陽所至爲腰痛厥論手太陽
厥逆腰不可俯仰刺腰痛篇足太陽脈令人腰痛引
項脊尻背如重狀刺其郄中太陽正經出血春無見

血刺腰痛論衡絡之脈令人腰痛不可以俛仰仰則
恐仆得之舉重傷腰衡絡絕惡血歸之王冰註衡橫
也太陽之外也故下文色見太陽之部靈樞經脈篇
膀胱足太陽之脈其直者從巔入絡腦挾脊抵腰中
是動則病脊痛腰似折素問藏氣法時論肝病者兩
脅下痛引少腹令人善怒熱論肝熱病者脅滿痛繆
刺論邪客於少陽之絡令人脅痛刺足小指次指爪
甲上與肉交者各一疔要同腰

又不得小溲不亟治病卽入濡腎及其未舍五臟急治
之病方今客腎濡此所謂腎痺也

正義濡溺也病方客在腎欲溺腎也

補註此腎氣不宣行之病素問五臟生成篇黑脈之至也上堅而大有積氣在小腹與陰名曰腎痺得之沐浴清水而卧痺論腎痺者善脹尻以代踵脊以代頭四時刺逆從論太陽有餘病骨痺身重不足病腎痺建病得之天雨雨與水從其類也

宋建曰然建故有要脊痛徃四五日天雨黃氏諸倩見建家京下方石卽弄之建亦欲効之不能起卽復置之暮要脊痛不得溺至今不愈

集解徐廣曰倩者女婿也案方言曰東齊之間婿謂

之倩郭璞曰言可假倩也京者倉廩之屬也

正義倩音七性反

建病得之好持重所以知建病者臣意見其色太陽色乾腎部上及界腰以下者枯四分所故以往四日知其發也臣意卽爲柔湯使服之十八日所而病愈

補註素問繆刺篇人有所墮墜惡血在腹中滿脹不得前後先飲利藥此上傷厥陰之脈下傷少陰之絡楊上善註利藥爲破血之湯可飲而利之當卽柔湯之類靈樞五色篇五色之見各出其色部又曰當臍者腎也面王以下者膀胱子處也又曰察其色天以

觀成敗今太陽色乾腎部枯而知要脅痛此倉公望色之神也

濟北王侍者韓女病要背痛寒熱眾醫皆以爲寒熱也臣意診其脈曰內寒月事不下也卽竄以藥

索隱謂以燻燻之故竄音七亂反

補註素問調經論經言陽虛生外寒陰虛生內熱陽盛生外熱陰盛生內寒上古天真論女子二七而天癸至任脈通太衝脈盛月事以時下陰陽別論二陽之病發心脾有不得隱曲女子不月評熱論病月事不來者胞脈閉也胞脈者屬心而絡於胞中今氣上

迫肺心氣不得下通故月事不來腹中論病名血枯
此得之年少時有所大脫血若醉以入房氣竭傷肝
故月事衰少不來也以四烏鰂骨一蘆茹二物並合
之丸以雀卵大如小豆以五丸爲後飯飲以鮑魚汁
利腸中及傷肝也

旋下病已病得之欲男子而不得也所以知韓女之病
者診其脈時切之腎脈也嗇而不屬嗇而不屬者其來
難堅故日月事不下肝脈弦出左口故曰欲男子不可
得也

補註屬說文連也從尾蜀聲徐曰屬相連續若尾之

在體故從尾時醫治室女經閉謂肝脉弦長上出寸口魚際非藥所能治急與壻配卽愈卽本諸此

臨菑汜里女子薄吾病甚眾醫皆以爲寒熱篤當死不治臣意診其脈曰蟯痕

索隱汜音凡蟯痕音饒檟舊音遶遐

集解徐廣曰蟯音饒

正義人腹中短蟲

補註蟯說文腹中短蟲也關尹子六七篇我之一身內變蟯蛔外蒸蝨蚤靈樞厥論腸中有蟲痕及蛟蝨大鍼刺久持之蟲不動乃出鍼中藏經第十八九蟲

有伏虵白肉肺胃赤弱虵之九名也虵狀如蛔蟲而甚小雄者長一分雌者長三分許色白形圓末端彎曲寄生於人腸多由食物時誤燕其卵而生時自肛門匍匐而出令患者肛門奇癢腫痛或至潰爛並發腹痛頭痛惡心嘔吐等症用驅蟲劑或灌腸法可除之或云居脬腸之間多則爲痔爲痢劇則爲癰並生瘡痍癰疽癰瘻癰疥等証

虵瘕爲病腹大上膚黃羸循之戚戚然臣意飲以芫花一撮卽出虵可數升病已三十日如故

補註本經芫花味辛溫主咳逆上氣喉鳴蟲毒瘡疔